

# Managing National Assessment Report

## Te Kura Kaupapa Maori o Hoani Waititi

18 Here-turi-koka 2022

# FINDINGS OF THIS REVIEW

## Te Kura Kaupapa Maori o Hoani Waititi

### 18 o Here-turi-koka 2022

### Kua mana te Whakaaetanga ki te Aromatawai

I teenei arotakenga kei te whakatutuki te kura i ngā hiahia o te *Whakaaetanga ki te Aromatawai i ngā paerewa e ai ki Ngā Ture kei te Papatohu Paerewa Aromatawai 2021*.

E ū ana Te Kura Kaupapa Māori o Hoani Waititi ki ngā whakahaere aromatawai ā-motu. Kei a ia āna ake tukanga tāutu me te whakaea i te nuinga o ngā take ka ara ake.

I runga anō i ngā kitenga o tēnei arotakenga pūnaha aromatawai mō te tohu mātauranga ā-motu, ka whakahaeretia anōtia tēnei arotakenga i roto i te toru ki te rima tau.

## Hei mahi, hei whakaarotanga iho

### Hei Mahi

E whakaae ana ngā pou o te kura ki ēnei awhina hei whakapakari ake i te kounga o ngā tukanga aromatawai mō te tohu mātauranga ā-motu.

Hei mahi	Angawā
<b>Arotake tarāwhare, tarāwaho</b>	
Kia whakaritea mai he wā motuhake i roto i te wiki e pai ai te wānanga ā ngā kaiako i ngā kaupapa huhua o te NCEA. Hei huarahi whakapakari i ngā wāhanga e whai hua ai ngā kaiako.	Kotahi tau.

Kay Wilson  
Manager  
School Quality Assurance and Liaison

22 Mahuru 2022

**NZQA**

**0800 697 296**

**[www.nzqa.govt.nz](http://www.nzqa.govt.nz)**

## Arotake tarāwaho me te tarāwhare

### Arotake tarāwaho

*Kua tutuki ngā tono me ngā tūtohutanga i whakatakotohia ki te pūrongo o te tau 2016. (Aratohu CAAS 2.6iv, 3iv-3v)*

**I Te Pūrongo Whakahaere Aromatawai ā-motu i tū i te 19 o Whiringa-a-nuku 2016, anei ngā mahi hei whakatutuki mā te kura.**

- he whakatakoto pūnaha arotake me ngā hua o ngā panonitanga hei whakawhanaketanga
- he whakamahi i te tukanga whakamana mō ngā taunaki kī taurangi
- he whakarite me te aroturuki i tētahi mahere ki te whakaea i ngā aromātauria kāore anō i eke noa ki ngā taumata e tika ana.

I roto i ngā tau kua whai wāhi te kura ki te hōmiromiro ki āna pūnaha me ngā tukanga whakahaere. Nā ngā tini hui ā-kaiako ka tipu ai te māramatanga i roto i ngā mahi NCEA. Nā ngā mahi nui hoki a te kaitakawaenga ki te Tumuaki me āna ringa awahi, i toka ai ēnei āhuetanga ki roto i te kura.

Kua whānui ake te mōhiotia o ngā kaiako ki ngā tukanga kohi taunakitanga mō ngā Taunaki Kī taurangi. E kitea mai ana i roto i ngā tukanga aromātauria ā-roto me ngā whakataunga ā ngā kaiaromātauria i ngā tukanga aromātauria ā-waho. I runga i tēnā whakaaro, kua oti i te kura āna tukanga te whakatakoto hei whakaea i ngā take aromātauria i tātuhia. Mai i te 2016 kua tae katoa mai ngā paerewa aromātauria i tīpakoria mā ngā kaiaromātauria, ā, kua kounga ake ngā whakataunga māka ā ngā kaiako i te nuinga o ngā marau.

**Urupare ki ngā putanga aromātauria tarāwaho me ngā tukanga** He whakamātau he ako, he ako he whakamātau te mahi. Ka whai wāhi ngā kaiako ki te wānanga i ā rātou mahi. He wānanga hoki me ngā pou o te kura ki te āta whiriwhiri mehemea kei te huarahi tika rātou e haere ana. He aha anō hoki ngā wāhanga o ngā mahi hei tiroiro, hei whakatikatika, hei whakāroaro.

Ko tā ngā rīpoata aromātauria he momo taunaki anō me i tika tā ngā kaiako i whakapae ai, kāore rānei. Ka kore ana i tatū ki tā ngā kaiaromātauria i pai ai, kua noho iho aua kaupapa hei take wānanga mā ngā kaiako. Ko te painga tēnei o te whakapakari pukenga, o te whai wā a te hunga mōhio ki te awahi, ki te ārahi, ki te tohutohu kia mārama pai ai ēnei āhuetanga.

### Arotake tarāwhare

Kei roto i te aromātainga me ngā arotakenga ngā rautaki whakapakari i ngā pūnaha whakahaere me ngā tukanga aromatawai a te kura.

He hunga arotake tēnei hunga. E wānanga ana i te ao, i te pō ki te whiriwhiri i ngā huarahi hei whakapai ake i ā rātou pūnaha whakahaere aromatawai me ngā tukanga hoki.

E whakaae tahi ana te kura kia whai wā motuhake ake nei ngā kaiako ki te āta wānanga i ngā pūnaha NCEA i roto i te wiki. He ahakoa ngā hua e kitea ana i ngā wānanga e whakahaerehia ana i tēnei wā, inā noa atu ngā akoranga me ngā hua ka puta ki te arongia ēnei āhuetanga. Kei ngā pou o te kura tonu ētahi rautaki hei

whakamahere i te āhua o ēnei whakahaere, ko te mahi nui he whiriwhiri kau ki hea whakaurua ai.

## **Te tautoko ake i ngā raukura me ngā tikanga aromatawai**

*Te taunaki ake i ngā tikanga aromatawai me tana tautoko i ngā hiahia ā ngā raukura. (CAAS Guidelines 2.5v-vii, 2.6i & ii and Assessment Rules for Schools, TEO's assessing Achievement Standards and Candidates 2023.)*

Kua tangata whenua ngā tikanga whakahaere ki roto i te kura. Ki te ara ake he tikanga hou, ka whai wāhi atu ngā Kaitakawaenga ki te wānanga tahi me ngā kaiako. Ko te waimarie hoki pea o te kura, kei roto i a ia ētahi kaiako kei ngā pae ā-motu o te NCEA e noho ana ka mutu, he mōhioranga ēnei ka whakahoki atu ki te kura hei wānanga mā rātou. Ko ngā raukura hoki e mātau ana ki ngā tikanga o te Taunaki Kī Taurangi, te Hāponotanga me ngā tikanga whakatutuki tohu mātauranga.

**He raukura ora** Ko ngā raukura te mea nui o roto i te kura, ko ngā whānau hoki tētahi wāhanga matua e puta ai ngā ihu o ngā raukura. E kaha tautoko ana te kura i ngā tini āhuatanga ka puta i ngā whānau, rawa atu ngā toimahatanga o te wā. E ora ai ngā raukura ki rō kura, me rite tonu te ora o ngā whānau. I ngā wā e taea ana e te kura, ka tahuri ia ki te kimi huarahi motuhake mā tēnā me tēnā tamaiti e tutuki tonu ai ngā manako o ngā whānau, e angitū hoki ai ia i ngā mahi kura.

He tini huarahi ka whāia kia tutuki ai ngā aromatawai. He tini kaupapa hoki ka whāia e te kura, ā, mā roto mai i aua kaupapa ka puea ake ētahi taunakitanga, ehake i te mea he kimikimi noa. Kei ngā kaupapa a te kura ngā horopaki e hāngai pū ana ki te ao o te tamaiti. Ka ora a NCEA i roto i ēnei kaupapa engari, ka ora kē atu te ngākau, te wairua, te tinana me te hinengaro o te tamaiti.

**He taonga te kaiako** He rau ringa kei roto i te kura hei ārahi, hei awhi, hei manaaki i ngā kaiako hou. Mai i ngā tukanga aromātauria ki ngā tikanga aromatawai. Katoa mai ka whai wāhi ki te whakapakari, ki te whakangungu kia ekea ai tētahi taumata o te māramatanga i te kaiako e ako ana i ngā āhuatanga o te kura.

## **Ngā tikanga aromātauria tarāwhare hei whakaū huanga pono**

*Te taunaki ake ā ngā mahi aromātauria tarāwhare, tarāwaho hoki ki te whakaū aromatawai kounga. (CAAS Guidelines 2.6iii & vi, and NZQA Assessment Rules for Schools, TEO's assessing Achievement Standards and Candidates 2023.)*

E mātau ana ngā kaiako ki ngā tikanga, ā, ka whai taua hunga ki te whakapakari i a rātou anō i roto i ngā huihuinga kaiako me ngā hoa kaiako o waho i te kura. Ka noho ko ēnei kaiako hei pou hāpai i ngā kaiako hou ki te kura. Ko te otinga o ngā mahi nei ka tau ki te aroaro o te Kaitakawaenga, ki te hōmiromiro i ngā mahi i mua i te tuku ki a NZQA. Kua toka ēnei ngā tukanga whakahaere aromātauria tarāwhare i roto i te kura.

Kei roto anō i ngā tukanga nei ngā wānanga ā ngā kaiako i ngā wā e taupatupatuhia ana ngā whakataunga ā ngā kaiwhakatūturu, ngā kaiaromātauria tarāwaho rānei. He wāriu nui o roto i tēnei mahi mā ngā kaiako, rawa atu te hunga e ako tonu ana.

Mā roto mai i ēnei tukanga aromātairua e mōhio pai ai te Kaitakawaenga, e whai hua ana ngā tukanga, e mārāma ana ngā kaiako ki aua tukanga, ā, e kounga ana ngā māka e tukuna atu ana ki a NZQA.

## Appendix 1: Tikanga Whai Hua

Tikanga whai hua hei whakatutuki i ngā hiahia o ngā raukura

**E taunga ana ngā pūnaha me ngā tukanga whakahaere a Te Kura Kaupapa Māori o Hoani Waititi ki te whakatutuki i ngā hiahia o ngā raukura mā te:**

- waihanga hōtaka ako, hōtaka aromatawai e hāngai ana ki ngā horopaki motuhake a te kura e tutuki ai ngā manako o ngā raukura
- whakawhitiwhiti kōrero me ngā raukura i roto i ngā aromatawai kia tauutuutuhia ngā mōhioranga e puta ai ngā taunakitanga papai ā ngā raukura, me te hāngai pū o aua taunakitanga ki te paerewa
- totoro ki ngā kaihora tarāwaho hei whakawhānui i ngā aheinga aromawatai
- taki aromatawai i te wā e rite ana te tamaiti
- tāutu i ngā raukura e tōmuri ana, e mate ā-ako ana kia tautoko mā te tono aromatawai hira
- whakauru haere ki ngā pae aromatawai o NZQA kia whānui ake te mōhiohia ki ngā pūnaha me ngā tukanga
- kimi ara huhua ki te kōhi taunakitanga aromatawai hei whakatutuki i ngā hiahia o ngā raukura

**E taunga ana ngā pūnaha me ngā tukanga whakahaere a Te Kura Kaupapa Māori o Hoani Waititi ki te:**

- whakahaere i ngā aromatawai tōmuri, aromatawai mahue
- whakahaere i ngā aromatawai whakawhānui aheinga
- tūhura i ngā whakataunga aromatawai ka puta i ngā tono ā-raukura
- whakamahi rautaki huhua noa ki te aroturuki i te tūturutanga o ngā mahi ā ngā raukura
- kōhi taunakitanga pono me te tika hei whakatūturu i ngā taunaki kī taurangi
- tautiaki i ngā kōrero matatapu ā ngā raukura

## Aromātairua tarāwhare, tarāwaho whai hua hei whakaū i te kounga o ngā aromatawai

### **E taunga ana ngā pūnaha me ngā tukanga whakahaere aromātairua tarāwhare a Te Kura Kaupapa Māori o Hoani Waititi mā te:**

- arohaehae i ngā tūmahi aromatawai i mua i te whakamahinga
- whakamahi i ngā aratohu whakamārama, ngā tauira, ngā pitopito kōrero a te kaiwhakatūturu, me ngā akoranga ara rau hei ārahi i ngā whakataunga aromatawai
- whakamahi mātanga kaupapa ako hei whakatūturu whiwhinga mō ngā mahi ā ngā raukura i āta tīpakoria
- whakamahi kaiwhakatūturu tarāwaho
- te whakapukapuka i ngā hātepe tukanga aromātairua tarāwhare
- arohaehae me te whakapukapuka i ngā tukanga aromātairua tarāwhare hei whakaū i te kounga o ngā whiwhinga i mua i te tuku ki a NZQA

### **E taunga ana ngā pūnaha me ngā tukanga whakahaere aromātairua tarāwaho a Te Kura Kaupapa Māori o Hoani Waititi mā te:**

- whakarite me te pupuru i ngā tauira mahi ā ngā raukura kia mātua rite mai
- tīpako tauira mahi e ai ki ngā tikanga a NZQA
- urupare ki ngā putanga o te aromātairua tarāwaho me te hāpai i ngā kaiaromatawai i ngā wāhi whai hua
- aroturuki me te whakapukapuka i ngā hātepe ka whakatinanahia i runga anō i ngā whakahoki pitopito kōrero ā ngā kaiaromātairua tarāwaho
- whakamahi i ngā whakataunga aromātairua tarāwaho ki te aromātai i ngā hua o ngā tukanga aromātairua tarāwhare.

## Whakahaerenga raraunga whai hua

### **E taunga ana a Te Kura Kaupapa Māori o Hoani Waititi ki te whakamahi i ngā raraunga aromatawai hei tautoko i ngā whakataunga ā ngā raukura mā te:**

- aromātai i ngā hua o ngā hōtaka aromatawai kia mātua hāngai ki ngā hiahia o ngā raukura, ngā whāinga, hei tohu i ngā panonitanga ki ngā hōtaka me ngā paerewa
- apoapo i te reo o te tamaiti hei take aromātai i ngā kaupapa ako me ngā aromatawai me tūpono me panoni, me whakahoropaki, me tīni aromatawai rānei
- tuku pūrongo ki Te Poari me ngā putanga NCEA hei huarahi whakamahere rautaki, whāinga, tutukinga.

### **E taunga ana a Te Kura Kaupapa Māori o Hoani Waititi ki te tuku pūrongo raraunga whai hua mā te:**

- tuku kōpae raraunga i ngā wā e tika ana

- titiro ki ngā hapa kei te Key Indicators me ngā pūrongo a NZQA
- whakauru wawe i ngā raukura e whai ana i ngā whakamātautau tarāwaho, me ngā whiwhi tarāwhare kāore i whai whiwhinga
- tuku whiwhinga ki raro i te kaihora tika me te whai Whakaaetanga

## Te pāhekoheko aromatawai whai hua hei huarahi whakamōhio i ngā kaiako, ngā raukura me ngā whānau

### **E taunga ana ngā pūnaha me ngā tukanga whakahaere a Te Kura Kaupapa Māori o Hoani Waititi ki te:**

- whakaputa mōhiohio hāngai ki ngā aromatawai
- tuku puka mōhiohio ki ngā raukura
- tuku hōtaka ako ka whāia e ngā raukura
- tauawhi i ngā raukura me te aromātai i ngā tutukinga
- tuari i ngā kaupapa here aromatawai o te wā ki ngā kaiako i te roanga ake o te tau
- whakarite huarahi e taea ai e ngā mātua ngā whiwhinga, ngā whanaketanga ā ngā raukura te kitea mai
- tautoko i ngā kaiako hou ki te kura ki te whakawhanake i roto i ngā hōtaka a te kura, me te mārama ki ngā tukanga aromatawai a te kura, a NZQA hoki

### **He mea tautoko e Te Kura Kaupapa Māori o Hoani Waititi i te māramatanga ki ngā tukanga aromatawai mā te:**

- tuari i ngā pitopito kōrero aromatawai, i roto i ngā hui mātua, hui whānau me ngā huihuinga raukura
- whakamōhio atu ki ngā raukura ngā huarahi mātauranga e taea ana
- tautoko i ngā raukura kia mārama ai ki ngā huarahi e ekea ai a angitū, e whai tohu ai ia

## Appendix 2: Tirohanga Whānui

### Tēnei Pūrongo

He pūrongo whakarāpopoto tēnei i te arotakenga a NZQA i Te Kura Kaupapa Māori o Hoani Waititi ki te:

- whakaea i ngā take i tātuhia i te arotake Pūnaha Whakahaere Aromatawai ā-Motu mā roto mai i tāna ake arotake tarāwhare
- whakahaere tikanga aromatawai mō te tohu ā-motu
- te whakahaere aromātairua tarāwhare, tarāwaho
- te whakamahi me te whakahaere i āna raraunga aromatawai
- te whakaū i ngā kaupapa here me ngā tikanga whakahaere, me te tuari ki ngā kaiako, ngā raukura me ngā whānau.

### He aha i arotakengia ai ngā pūnaha whakahaere aromatawai a te kura

Te take o Te Whakahaere Pūnaha Arotake ā-Motu:

- ki te whakaū i te kounga o ngā whakahaere a te kura, i runga anō i te pūrongo a Te Tari Arotake Mātauranga, me te hāngai ōna ki ngā tikanga o te Whakaaetanga ki te Aromatawai i ngā paerewa, e ai ki te Papatohu Paerewa Aromatawai 2011 (Consent to Assess Against Standards on the Directory of Assessment Standards Rules 2011) me ana Whakahaerenga – (CAAS Guidelines) e āhei tonu ai te kura ki te aromatawai i ngā paerewa ā-motu mō ngā tau kei mua i a ia, ā,
- hei āwhina hoki kia tika ai, kia ōrite ai, kia pono ai ngā mahi aromatawai ā-roto, kia hāngai tonu ki ngā whakaritenga o ngā *Ture Whakahaere Aromatawai me ngā Whakamātautau mō ngā Kura Tuarua (Rules and Procedures)*.

### Ngā tūmomo putanga e taea ana

#### Ngā tūmomo putanga a NZQA:

- te tāutu i te kounga o ngā tukanga arotake a te kura, āna tikanga whakahaere aromatawai me te kounga ki te whakaū i aua whakahaere
- te whakahau i te kura kia mātua tutuki ngā hei mahi me tūpono kāore i tatū ai ngā whakahaere ki ngā ture o te *Whakaaetanga ki te Aromatawai*
- te whakaae tahi me te kura ki ngā take ka tāutuhia me tūpono ka hē kē atu ngā whakahaere
- te tohu i ngā mahi hei whakaroaro hei whakapakari ake i ngā tikanga aromatawai.

## Ngā wāhanga o te arotake

### **E toru ngā wāhanga o tēnei arotake:**

- te aromātirua tarāwaho ā-tau i te aromatawai tarāwhare a te kura
- te hihira ā-tau i ngā pūnaha aromatawai tautuhi
- te hihira ia rima tau i ngā pūnaha aromatawai a te kura